



N°7557
Entrée le 06.02.2023
Chambre des Députés
Déclarée recevable
Président de la Chambre des Députés
(s.) Fernand Etgen
Luxembourg, le 06.02.2023

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Tratten, de 6. Februar 2023

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Ëmweltminister, un den Här Landwirtschaftsminister an un den Här Aarbechtsminister weiderzeleeden.

Am Wäibau-Secteur gëtt et den Ament vill Opreegung ëm eng geplangte Veruerdung vun der EU, déi méi streng Reegele beim Gebrauch vu Planzeschutzmëttel virgesäit. D'Wënzer maachen sech an deem Kontext Suergen ëm hir Zukunft a ginn ze bedenken, datt mat dësen Oplagen den Ubau vun Drauwe besonnesch an den ausgewisene Schutzgebiddere - betraff si virun allem Schengen, Wuermer awer och d'Randberäicher vum groussen Tréntengerdall - kaum nach bis iwwerhaupt net méi méiglech wäert sinn.

Iwwerdeems bekloen sech vill Wënzer ëm déi exzessiv Kontrolle vun der ITM, déi dacks genee da kontrolléieren, wann am meeschten Aarbecht ass. An engem Zeitungsartikel vum 6. Februar geet esou guer Rieds vun engem Fall, wou 15 Persoune vun der ITM ganz Wäibierger ofgerigelt hunn, fir Kontrollen ze maachen, esou datt den normalen Aarbechtsoflaf iwwerhaupt net méi méiglech war.

An deem Kontext hätt ech folgend Froen un d'Regierung:

1. Wéi positionéiert sech d'Regierung am Hibleck op déi geplangten EU-Veruerdung, déi de Wäibau a verschiddene Gebiddere um Lëtzebuurger Territoire just nach ganz schwéier bis hin zu iwwerhaupt net méi méiglech mécht?
2. Gedenkt d'Regierung an deem Kontext op EU-Niveau géint déi geplangte Veruerdung virzegoen, fir esou d'Existenz vun de betraffene Wënzer weiderhin ofzesécheren?
3. Wa jo, wéi wëll si dobäi genee virgoen? Wann nee, wéi eng Mesurë gedenkt d'Regierung ze ënnerhuelen, fir d'Existenz vun de betraffene Wënzer-Betriber an deene Gebiddere weiderhin ze assuréieren?
4. Gedenkt d'Regierung den Dialog mat der ITM ze sichen, fir datt an Zukunft d'Kontrolle bei de Wënzer-Betriber esou ausfalen, datt net ganz Wäibierger ofgespäert ginn an den normalen Aarbechtsoflaf net méi méiglech ass?

Mat déiwem Respekt,



Jeff Engelen
Deputéierten



Gemeinsam Äntwert vum Här Minister fir Landwirtschaft, Wäibau a ländlech Entwécklung, der Madamm Ministesch fir Ëmwelt, Klima an nohalteg Entwécklung an dem Här Minister fir Aarbecht op d'parlamentaresch Fro n° 7557 vum 6. Februar 2023 vun dem éierewäerten Deputéierten Här Jeff Engelen

- 1. Wéi positionéiert sech d'Regierung am Hibleck op déi geplangten EU-Veruerdung, déi de Wäibau a verschiddene Gebidder um lëtzebuurger Territoire just nach ganz schwéier bis hin zu iwwerhaupt net méi méiglech mécht?**

Grondsätzlech ass d'lëtzebuurger Regierung mat den Zieler vun der Proposition vun der EU-Kommissioun fir e neit Reglement iwwert eng nohalteg Notzung vu Planzeschutzmëttel d'Accord. Eng Reduzéierung vun Opwand vu Planzeschutzmëttel an eng méi nohalteg Uwendung vun esou Mëttele wierken sech net nëmme positiv of de Natur- an Ëmweltschutz aus, mee och op d'Kompetitivitéit vun eise Produktiounsbetribler. Lëtzebuerg ënnerstëtzt duerfir d'Grondausriichtung vun dëser Proposition, déi zur Zäit um Niveau vun EU-Conseil diskutéiert gëtt. Allerdéngs gi verschidden Elementer vun dësem Kommissiounsvorschlag aktuell nach vu ville Memberstate kontestéiert. Genau esou ewéi aner EU Memberstate gesäit d'lëtzebuurger Regierung verschidde Punkte vun dësem Vorschlag vun der Kommissioun och kritesch, besonnesch de kategoresche Verbuet vu Planzeschutzmëttel an den Schutzgebidder.

- 2. Gedenkt d'Regierung an deem Kontext op EU-Niveau géint déi geplangte Veruerdung virzegoen, fir esou d'Existenz vun de betraffene Wënzer weiderhin ofzesécheren?**

Den Textentwurf zu dem neien EU-Reglement ass an engem fréien Stadium vun der Prozedur. Aktuell gëtt den Text nach an Arbechtsgruppen diskutéiert an iwwerschaaft. Ausserdeem hunn d'EU-Agrarministeren, d'Kommissioun opgefuerdert, eng Impaktstudie ze maachen, fir ze evaluéieren, wat fir eng Konsequenzen d'Proposition vun der Kommissioun op Landwirtschaft, Gaardebau a Wäibau hätt. D'Regierung wäert an der weiderer Prozedur fir e méi differenzéiert Reglement antriëden fir sécher ze stellen, datt Baueren, Wënzer a Gäertner weiderhin hire Beruff ausüben a Liewensmëttel produzéieren kënnen, och an Schutzgebidder am Respekt vun eiser Ëmwelt a vun eis aller Gesondheet.

- 3. Wa jo, wéi wëll si dobäi genee virgoen? Wann nee, wéi eng Mesurë gedenkt d'Regierung ze ënnerhuelen, fir d'Existenz vun de betraffene Wënzerbetribler an deene Gebidder weiderhin ze assuréieren?**

D'lëtzebuurger Regierung wäert sech an all Etapp vun der europäescher legislativer Prozedur asetzen fir den Reglementstext méi differenzéiert ze gestalten, fir datt des Reglementatioun d'Existenz vun de Baueren, Wënzer a Gäertner, och an dësen Gebidder, net a Fro gestallt get.

- 4. Gedenkt d'Regierung den Dialog mat der ITM ze sichen, fir datt an Zukunft d'Kontrolle bei de Wënzer-Betribler esou ausfallen, datt net ganz Wäibierger ofgespaart ginn, an den normalen Aarbechtsoflaf net méi méiglech ass?**

Am Joer 2021 huet d'ITM iwwer 10.000 Kontrolle bei verschiddene Betribler vun alle Secteuren duerchgefouert. Am Kader vun dëser Kontrolle gouf iwwerpréift, ob d'Reegele betreffend den Aarbechtsbedingungen an der Sécherheet a Gesondheet op der Aarbecht agehal gi sinn. D'Kontrolle vun der ITM fannen ëmmer während den Aarbechtszäite statt, sou wéi dat am Aarbechtsgesetzbuch virgesinn ass.

D'lescht Joer goufen 30 vun insgesamt 266 Wënzerbetriber kontrolléiert. Dës Kontrolle goufe während 3 Deeg vu 6 bis 8 Inspekteren duerchgefouert. Och goufen am Kader vun dese Kontrollen d'Wäibierger net ofgerigelt well dat och logistesche guer net méiglech ass.

Et kann een also net behaupten dass et sech hei ëm exzessiv Kontrolle vun der ITM handelt, mee d'ITM huet am Kader vun hire Kompetenze ganz normal Kontrollen duerchgefouert wéi se dat och an all deenen anere Secteure mécht.

Vun deenen 30 kontrolléierte Wënzerbetriber haten der 13 d'Reegele vum Aarbechtsgesetzbuch respektéiert, a bei 17 Stéck goufen Irregularitéite festgestallt. Dëst ënnersträicht d'Noutwennegkeet vu dese Kontrollen. Déi betraffe Betriber goufen opgefuerdert sech innerhalb vu 15 Deeg ze regulariséieren. D'Wënzerbetriber, déi am stännegen Dialog mat der ITM waren, an déi méi Zäit gebraucht hu fir sech kënnen ze regulariséieren, kruten e méi laangen Delai accordéiert fir dëst kënnen ze maachen.

11 Wënzerbetriber kruten eng Geldstrof, well si net op d'Injonctiounen vun der ITM reagéiert hunn, respektiv well si sech net oder net integral regulariséiert hunn.

An dëst, obwuel den Institut Viti-Vinicole, zesumme mat ënner anderem der ITM, d'lescht Joer an d'virläsch Joer speziell Formatiounen fir d'Wënzerbetriber organiséiert huet. Och goufen de Wënzerbetriber Informatiounen iwwert d'Aarbechtsbedingungen an der Sécherheet a Gesondheet op der Aarbecht op den Internetsite vum Institut Viti-Vinicole a vun der ITM zur Verfügung gestallt. Zousätzlech huet d'ITM de Wënzerbetriber Modeller vun engem Aarbechtsvertrag fir saisonal Aarbechten a vu Registere fir d'Aarbechtszäiten an de Congé zur Verfügung gestallt.

D'ITM steet de Wënzerbetriber weiderhin zur Verfügung, fir hinne kënnen ze hëllefen sech un d'Reegele betreffend den Aarbechtsbedingungen an der Sécherheet a Gesondheet op der Aarbecht ze halen, genausou wéi dat och an den anere Secteuren de Fall ass.

Lëtzebuerg, den 7. März 2023

De Minister fir Landwirtschaft, Wäibau a ländlech Entwécklung,

(s.) Claude HAAGEN